


AWOR DROGA TA BIN FOR DI HULANDA PA ARUBA



ORANJESTAD (AAN): Aruba su nomber a worde mancha den pasado caba, pa trafication di droga cu tabata tumando lugar, for di America Latina via Aruba pa Europa y Merca.

Autoridadnan na Aruba, ta haciendo nan maximo esfuerso, pa combati e trafication di droga, na Aruba mes y droga cu ta pasando di transito cu direccion pa Europa y Merca.

Aruba conhuntamente cu autoridadnan Antiyano, Mericano y Hulandes ta trahando ariba e proyecto di kustwacht, pa asina trece un instrumento mas potente, den e combatimento di droga den e Region di Caribe.

Traficantenan di droga, ta usa tur sorto di manera, pa nan por transporta e maldita droga te na su destinacion final.

Barconan, avionnan, mulanan y te hasta Post ta worde usa pa manda droga pa Merca Y Europa.

Autoridadnan Hulandes ta pone bon vigilancia, ariba coreo cu ta sali for di e Region di Caribe pa Hulanda.

Pakinan y cartanan ta worde controla ariba nan contenido y asina varios canalnan di distribucion di droga, a yega di worde intercepta pa autoridadnan Hulandes.

ALGO NOBO: Pero awor ta parce cu un parti di e mercado a cuminsa boltia.

Na Hulanda e venta di soft drugs, manera Marihuana den cantidad chiquito, a bira algo normal.

Den diferente ciudadnan grandi manera Amsterdam, Rotterdam, Utrecht etc. Marihuana por worde cumpra den Theehuisnan, cu ta worde tolera pa autoridadnan.

Cada kende por drenta den

un Theehuis y asina cumpra su cigarra di Marihuana, pa asina dal so droga tranquillo den e Theehuis mes of na cas of ariba caya.

Hulanda a bay asina leu caba cu Marihuana ta worde cultiva na Hulanda mes.

Den e kassennan cu normalmente, ta worde usa pa cultiva berdura den e temporada di winter, Marihuana ta worde cultiva awendia.

Den e kassennan aki e temperatura por worde hisa te na nivel di e regionnan tropico.

Asina un sorto di Marihuana nobo, por a worde cultiva na Hulanda mes, cual ta worde yama Nederweed.

E Nederweed aki ta worde bendi den e Theehuisnan den nan paki di plastic, cu e ensigna di e mata di Marihuana ariba dje, manera ta un mangel bo ta cumpra cu e propaganda y marca ariba dje.

Pero un mercado nobo a worde descubri, pa esnan cu ta bende e Marihuana aki na Hulanda y esey ta e mercado di Caribe, pasobra ta parce cu e Nederweed aki ta di un calidad cu por competi cu e Marihuana di Caribe.

DIARIO a haya informacion clave tocante e tendencia negativo aki.

Ta parce cu droga ta bin awor for di Hulanda pa Aruba via carta.

E mesun saconan chiquito aki cu ta worde bendi na Hulanda den e Theehuisnan, ta worde manda awor pa Aruba den carta.

Autoridadnan na Aruba a sa di intercepta un carta, cu a worde manda for di Hulanda pa Aruba cu dos saco chiquito di Nederweed.

Esaki ta paboo
Mi no tin mi boso
Mi no por manda e video pa
mi celular y nan abo
ken ta bai catch e porci
Mi bai mandabo skarta
y bo ta warda dos pa ora
bo bini
I'm high 2 high

Den e carta aki ta worde menciona, cu mas tin pa manda pero esnan cu mester manda e droga, ta un poco cauteloso pa autoridadnan no intercepta e cargamento.

Autoridadnan mester keda bon alerta, pasobra awor ta trata di un cantidad chiquito, pero den futuro esaki por bira otro dolor di cabez pa nos comunidad.

Esta straño cosnan sa bay den e bida aki, na lugar cu nos mester combati e trafi-

cacion di droga di Aruba pa Hulanda, den futuro nos por haya nos mes den e situacion, cu nos mester cuminsa combati droga cu ta bin for di Hulanda pa Aruba.

Con ta para cu e kustwacht di Hulanda?

Kizas na Hulanda tambe nan lo haya: "De man van het Volk" (e homber di pueblo) cu ta exige un avion Orion pa cada ciudad.

E ora ey si Marina Real lo haya su mes den preta!

